

ie vous liure vn bon poinçon de sidre: dont il vous
 faut payer quinze liures, il ne vaut voirement que
 six ou sept d'achapt dans le pays, mais les frais
 qu'il a fallu pour ie mener coustent plus que le
 principal, tellement que s'il n'y a point de vin à
 Diepe, & qu'il en faille faire venir d'Orleans, il
 faut que les mesnages participent à ces frais, &
 par ainsi ce qui leur cousteroit fort peu dans le
 pays, sans la cōsideratiō de ces frais, il faut ce non-
 obstant qu'ils en passent par là: Monsieur le mar-
 chand vostre traicte paye bien vos frais: mais le
 pauvre mesnage n'a que faire de ces auarices, puis
 qu'il ne vous en fait point, pour vous liurer sa
 marchandise. Bref, vous voyez que pour le peu qui
 luy aduancent, ils commencent à tirer profit de
 vingt-cinq pour cent, & qu'ils l'obligent d'assister
 les malades sans salaires & gratis. Hé Messieurs
 ne liez point le museau au bœuf qui traueille, &
 à celuy qui vous rend tous les ans à pres de quatre
 mille liures de rente, vous liurant la meilleure
 marchandise qui soit pour ces lieux, ne prenez pas
 plaisir de le voir obligé, qui enuers vous autres,
 qui enuers ses seruiteurs, qui à mener vne vie plus
 que miserable: il en va pourtant ainsi, & sans mi-
 sericorde: ceux qui ont sentiment de pieté reco-
 gnoissent assez que voila la teneur d'vn defraison-
 nable Contract, qui est ce nonobstant la seule for-
 me, où il faut que ceux qui voudroient aller en Ca-
 nada pour peupler se chaussent: qui vaut autant à
 dire, n'y va pas si tu ne veux estre tres-miserable,
 tres-esclau, & tres-injustement traicte sans mise-
 ricorde quelconque: mais sans misericorde, pour-